

27/01/1997

Golongan antimultimedia dibidas

KUALA LUMPUR, Ahad - Datuk Seri Anwar Ibrahim membidas segelintir pihak yang menganggap penggunaan alat multimedia akan mendatangkan kesan buruk kepada masyarakat di negara ini, khususnya umat Islam.

Sehubungan itu, Timbalan Perdana Menteri mengajak masyarakat Islam menerima perubahan dan bersikap positif terhadap penggunaan alat berkenaan yang semakin meningkat berikutan kepesatan pembangunan negara.

Menurutnya, kesan penggunaan alat multi-media, termasuk Internet bergantung kepada penggunaannya sama ada menerima yang positif atau sebaliknya.

"Internet ada yang baik dan ada yang buruk. Jadi siapa suruh cari yang buruk. Begitu juga dengan mendidik anak membaca, pilihlah bahan bacaan yang baik. Takkan oleh kerana ada bahan bacaan yang negatif, tidak beri anak membaca.

"Begitu juga dengan multimedia, terserah kepada kita untuk menggunakannya. Adalah tidak munasabah bagi kita membatalkan penggunaan multimedia disebabkan ada yang memberi kesan negatif.

"Bila Perdana Menteri (Datuk Seri Dr Mahathir Mohamad) memperkenalkan Koridor Raya Multimedia (MSC), beliau mahu umat Islam maju seperti negara lain di samping mempunyai ilmu pengetahuan. Oleh itu, kita perlu lihat perkara ini secara positif," katanya.

Beliau berucap di majlis berbuka puasa bersama pemimpin Umno Selangor dan Wilayah Persekutuan di Masjid Al Imam Ash Shafie Taman Maluri, dekat sini, malam ini.

Turut hadir Menteri Besar Selangor, Tan Sri Muhammad Muhd Taib; Menteri Perpaduan Negara dan Pembangunan Masyarakat, Datin Paduka Zaleha Ismail; dan Timbalan Menteri Penerangan, Datuk Drs Suleiman Mohamed.

Anwar yakin rakyat tidak akan terpengaruh dengan pandangan negatif segelintir pihak itu, sekali gus menjadikannya terpinggir dan tidak dapat mempengaruhi umat Islam di negara ini.

(END)